

# Finamira: Arver la proxima stad

La corporaziun dil hotel Ucliva pren emprimas decisiuns

DAD AUGUSTIN BEELI / ANR

■ **Sonda ein commembers dalla corporaziun dil hotel Ucliva s'entupai a Vuorz ad ina radunonza generala extraordinaria. La suprastanza haveva proponiu da serrar immediat il menaschi che seigi buca pli liquids.** Ils 21 da december han ils commembers dalla Corporaziun Ucliva retschert posta sin Nadal. Igl ei buca stau ils megliers auguris. La suprastanza ha annunziat l'insolvenza dil hotel Ucliva. Per tener en cunfin il donn seigi ei urgent da convocar ina radunonza extraordinaria. Per mauns da quella ha la suprastanza proponiu da serrar immediat il menaschi. «Dapi onns havein nus adina puspei communicau ch'il hotel ei occupaus memia pauc per saver generar avunda mieds liquids e cun quei garantir il menaschi e lavurs da manteniment». Cun quels plaids introductivs ha il president dalla Corporaziun Ucliva motivau il pass da convocar ina radunonza extraordinaria.

## Commembers ein solidarics

L'jamna avon Nadal e durant ils firaus e la scumiada digl onn han ins lu era discutau a Vuorz ed Andiastr vivamein dallas pauc bunas vestas dil hotel Ucliva. Sonda vargada, ils 21 da schaner – in meins suenter che la brev fuva ida – ha quella radunonza extraordinaria giu liug. La sala dall'Uclivetta, la casa annexa dil hotel Ucliva, ei stada pli pleina che tier las radunonzas generalas ordinarias. L'annunzia ch'il hotel seigi insolvent e ch'ins seigi sfurzaus da serrar ha leventau pulitas emozziuns. Denton era la solidaritad. Cuort suenter Daniev fuva la suprastanza danovamein s'adressada als commembers. «Suenter igl invit alla radunonza extraordinaria havein nus retschert biaras



Peter Stüssi (seniester) cul cussegliader Peter Baetschi, igl anteriur directur turistic a Flem-Laax-Falera.

FOTO A. BEELI

reacziuns da commembras e commembers ch'ei schoccai e che deploreschan il svilup. Biars d'els havevan registrau gia daditg ch'il hotel fuva occupaus memia pauc», ha la suprastanza informau.

Sefundond sin quell'actiun ha ella instradada ina acciun da rimnar daners tiels commembers dalla corporaziun. Finamira seigi da vegnir ensem culla summa da 100'000 francs. Sche quei gartegi sappien ins tener aviert il hotel tochen ils 31 da mars. Sonda vargada ha il president Peter Stüssi lu era saviu comunicar dalla bial'entschatta che la finamira seigi contonschida. «Grazia agl appel ei ina summa dad 85'000 francs vegnida ensem», conferma el el discurs

cul'ann. La suprastanza dalla corporaziun seigi enorm engrazieivla dalla buna veglia ch'els commembers demuossien.

## Menaschi marscha professionalmein

Dapi ch'ella haveva tarmess la brev culla schliata novitad dil hotel ein ils commembers separticipai activ d'anflar sli-giazziuns. La suprastanza hagi retschert differentas propostas ed ideas tgei far per sli-giar il problem. Quellas che fuvan arrivadas a scret ha la suprastanza stuiu tractandar. Aschia ha la radunonza generala giu da s'occupar d'ina gliesta pulpida cun propostas ed impuls. Dallas siat propostas ufficialas ha la radunonza giu da tractar sco emprema quella da serrar

immediat il hotel. Grazia alla garanzia finanziaria cun contribuziuns a fonds perdu dils commembers ella valeta dad 85'000 francs san ins menar vinavon il hotel. Silmeins tochen la fin dalla stagione d'unviern 2016/17 resta il hotel pia aviarts. Stüssi haveva dil reminent informau ils commembers gia ils 3 da schaner 2017 davart la situaziun actuala: «Il menaschi dil hotel Ucliva marscha professionalmein, la cuschina ei excellenta, las pistas ennevadas ein sorprendentamein bunas ed era neiv nova ei en vesta.» Mo che quei tut gida buca da dumignar ils problems dall'occupaziun munglusa da suletamein 35 pertschien. Il diember da pernottaziuns ei sereducus da 16'000

giu sin mo 6000. Las 22 combras ein occupadas bia memia pauc.

## Peter Baetschi, cussegliader

La radunonza extraordinaria ha tractau las sis ulteriuras propostas, ha denton buca priu claras posiziuns tier mintgina. Denter auter ha in commember proponiu da fundar ina uniun da fautors che duei purtar ils onns cun memia paucas pernottaziuns. In'otra persuna ha proponiu che la suprastanza dueigi incurir novas fontaunas finanzialas tier fundaziuns. In'ulteriura proposta ei stada da vender l'immobilia sur la cundiziun ch'il menaschi vegni menaus vinavon e las plazzas da lavur mantenidas.

Cun 950 commembers dispona la Corporaziun Ucliva d'in pulit potenzial da persunas che savessen sustener il hotel en ina fuorma ni l'otra. En scadin cass ha la radunonza generala extraordinaria decidu da fundar ina cumissiun che duei reponderar las structura ed ir alla tscherca da fontaunas finanzialas. Sco cussegliader han ins saviu gudignar Peter Baetschi da Tavau. Ina persuna ord il ravugl dils commembers dalla Corporaziun Ucliva finanziescha siu engaschi. Baetschi ei staus directur turistic tier la Arena Alva a Flem-Laax avon ch'il Club da hockey Tavau ha clamau anavos el a Tavau sco meinagestion. Avon cuort ha el fundau ina atgna firma da cussegliazion e management d'interpresas. Stüssi ha buna speranza ch'ei gartegi da salvar il hotel a liunga vesta. «Nossa finamira centrala eis ei en scadin cass da mantener quei menaschi. In niev concept ei denton necessari», declara el. Ils 21 da matg 2017 ha la radunonza generala ordinaria liug. Lu vegnan ils commembers a saver co ed en tgei fuorma ch'ei va vinavon cugl Ucliva.

# Aunghels – e mellis scalgias

Il Museum claustral a Mustér ha aviert ina nova partizun

■ **(anr/abc) Sonda ha igl avat dalla claustra da Mustér, Vigeli Monn, presentau alla publicitad ina nova part dil Museum claustral. Quella documentescha ina pintga part dallas excavaziuns archeologicas cullas stuccaduras digl Bavel tschentaner.** La claustra s. Gion da Müstair, en tschei cantun dil Grischun, ei tschien onns pli giuvna. Ella ei denton buca vegnida destruida pliras gadas sco quella da Mustér. Leu stat in monument culturhistoric el stil baroc ed ins pudess manegar che quel seigi vegnius baghegius per el 17avel tschentaner. Sonda vargada, durant la presentaziun, ha igl avat emeritau Daniel Schönbächler numnau pliras gadas durant siu plaid il historiograf dalla claustra da

Mustér. Pader Iso Müller ha perscrutau minuziusamein la historia dalla claustra e sia lavur vala aunc adina sco basa per auters scienzai.

## Pader Daniel seregorda

Gnanc a pader Iso fuvi reussiu da scuvierer il misteri dallas scalgias e las parts da mosaics ch'ins haveva anflau entuorn ils 1892 ella cuort dalla claustra. Igl avat emeritau seregorda che pader Iso menavi ils scholars ellas lecziuns da historia ina gada ad onn giuaden el sutterran per mirar quei areal che spitgava ch'enzatgi scuvieri il misteri. Pader Daniel ha descret als presents autenticamein co el sez ei s'avischinaus all'archeologia ed al vargau dalla claustra da Mustér. Sonda ha el priu

part dall'avertura dalla nova part dil museum. Daferton eis ei clar tgei che quella scalgia ein e tgei ch'ellas muntan. E naven d'uss anflan ils visitaders interessantas rispuestas leutier ella partizun nova.

Igl archeolog e perscrutader Walter Studer ha scuvretg il misteri dallas scalgias malegiadas. En tut ha el documentau rondund 12'000 parts d'ina stuccatura che decorava la veglia baselgia da s. Martin. Tut quei ch'ins haveva excavau han ins deponiu sin meisas egl anteriur bogn da senudar dalla scola. Leu ha Studer saviu perscrutar las parts. El ha fatg ei aschi minuziusamein ed era publicau lavurs surlunder. Trasora anflava el scalgias pli grondas nua ch'ins veseva fatschas malegiadas.

Aschia ha igl archeolog vuliu far ina cumbiniala, in puzzle, cun quei ch'el anflava. Gartegiau ei gliez denton buc. El ha denton constatua che las scalgias s'udevau tier ina representaziun monumental d'ina scena che mussava Nossadunna en bara. Ella baselgia ortodoxa ei quella scena enconuschenta cul num Koimesis, ella ei fetg presenta en tuttas fuormas digl art religios. Il misteri, daco ch'ins anflava a Mustér dil temps medieval tumpriv in tal maletg monumental bizantin, sa era Studer mo specular. El ei dil meini ch'ins hagi dau sura a dus muntgs che vegnevien si dad Aquileja da far quella lavur. Igl ei era in mussament ch'il territori dils Rets tunscheva bia pli lunsch che oz.

existenta. Igl intern da quella fuva decoraus cun rondund 150 figuras el stil bizantin, pia sco ellas baselgias ortodoxas digl ost. Ei stueva esser in hospezi dotaus directamein digl imperatur Pippin. A quella conclusiun vegn perinagada Studer. La cristianisaziun ei pia buca vegnida en Surselva sur Sigisbert, il muntg irlandes e cumpogn da Gallus e Columban, mobein si dil sid, da Ravena, Milaun ed Aquileja. La nova partizun dil Museum claustral da Mustér ei buca gronda, denton fetg instructiva e schizun divertenta.

reclama



Bruno W. Claus  
Präsident FDP  
Graubünden  
Chur

“Zuverlässiges  
Verkehrssystem –  
starkes Gewerbe.”

www.NAF-ja.ch

Am 12. Februar  
**JA**  
zum NAF

So fährt die Schweiz gut.



Walter Studer (davontier) ha veseivel plascher che la claustra da Mustér ha integrau sias perscrutaziuns en in sector niev dil Museum claustral. Dretg igl avat emeritau Daniel Schönbächler. FOTO A. BEELI